

中國方志叢書·華北地方·第五四七號

據

清·畢沅、傅應奎纂修
乾隆四十九年刊本

影印

陝西

韓城縣志

(二)

成文出版社有限公司印行

列女

韓城縣志卷八

貞女

解貞女父爲中翰彥楨字給諫閻公之孫衍緒性孝而慧衍緒以疾死女聞之黯然魂消曰惟掩泣一日就閣沐浴易新衣將死母知之詭曰兒戲耳其祖中丞公壽氏登樓俯檻望門氏廬致饋一盂祝曰魂靈來忽涕下滂沱委頓於地家人扶歸遂奄奄病不食以死死之日欲有所言而止惟淚漉漉下祖父哀其志與衍緒合葬焉

阮貞女徐德厚妻聘定未娶厚商於外者十八年父母兄嫂逼嫁終日氏堅志不從急則手刀懸梁後夫歸得完娶人以爲難程烈女父懿受字孫紹曾未合卺紹曾死女欲弔其喪父母不許女惘然出涕時有議婚者女聞而泣曰虎尙不返食女豈可

重婚乘間自經死

陳烈女小字祥雲父陳忠女十歲忠巡檢閩中女與母衛氏家居母病且篤顧其兄諸生衛大鉞曰我卽死此兒尙未字人不能瞑目地下鉞曰我有一子年當此女以甥女爲兒婦可乎衛氏喜卽面許諾時旁無一人唯女在側聞之甚悉及其母卒鉞治喪事葬後不數日亦卒兄妹婚約忠在任不知也且皆死無有言之者因字楊家兒女聞之悲痛不欲生俟其父還點篋中衣物付其嫂謂父曰兒母許兒舅氏父許兒楊氏適舅無父適楊無母無父無母何以爲人言已入閤家人方圖所以善全者已自經矣悲哉死時年十八

鄭氏年十七于歸賈連科未及成婚科當夜外出竟不知所之氏守志食貧撫姪爲嗣子沒又撫孫歷盡艱辛無怨言壽九十

歲

韓城縣

貞女孫氏者白家莊孫豹如之女也字於某諸生劉維漢之子玳而未醮居無何玳故則固請以從弔者則守其靈而弗去父母促之不聽其翁姑勸之再四則曰兒固分作未亡人矣倘不然是以兒爲非人也則相從以就木焉父母遂不敢強而還爰取猶子承啟而嗣之當是時年方二十二家計蕭條自勤洒掃營績紙用能和於伯嫂以恪共省饌而督誦讀茹荼飲蘖甘心如飴二白賴之以終餘年無何子婦續逝遺孤四齡氏又於顛沛無告之際而爲撫藐諸孤之計雖悲痛深切仍善排譴惟有甘作未亡人而已前後邑令旌其門却之不獲年七十一而鶴髮童顏飄飄然如故身之仙邑侯呂兆鬣具以

聞

詔立貞女坊

烈婦

薛氏李煥妻煥商死河南昇觀歸里氏號呼幾絕粒米不入口
一日發奩付櫛珥輦悅於姑自飾衰麻坐夫石死

高氏王慎妻同十五歲女小桂避賊高寨寨破慎以捍賊中流
矢死高氏與小桂俱投崖死吉氏與其孫女王黑女亦居高寨
並投崖死王欣妻薛氏子端心真心並居高寨欣率其子真心
與賊戰死薛氏投崖死端心痛其父母與弟亦投火死左公祭
之以文所謂王氏男女節見者九是也俱薛峯村人

薛氏儒士解居乾妻也崇正八年流寇號八隊者蹂韓環刃相
向人被殺掠氏知不能脫徐弗爲動賊以氏容止端麗逼之氏
遂大罵賊手刃隨刃隨罵聲與氣絕而死死七日顏色如生見

解氏庠生衛冕妻廉憲經雅女也與景鰭相敬如賓鰭讀書
公式廬旌表左云節烈可風石云千秋碧血子延祚歲貢米脂
訓導

解氏庠生衛冕妻廉憲經雅女也與景鰭相敬如賓鰭讀書
屬文爲邑名士未幾以暴疾卒氏卽援刃自刎血淋漓遍體而
幸喉脰不絕如縷自午至酉方甦氏時甫二十歲翁姑環泣謂
兒有此節概胡弗爲夫繼後不賢於死乎氏遽悽然曰兒過矣
兒聞命矣遂以從子雲龍爲嗣撫育課誦旣已婚娶補諸生則
又不祿氏痛哭不食越三日於子柩前自縊死邑侯左公弔之
爲上其事奉旨給銀一百二十兩建坊
師氏張文軹妻生子二軹死氏縊於柩側二子哭而解之復甦
語家人曰我志決矣痛哭絕粒而死

陳氏楊先樓妻年二十五歲樓沒於水氏慟不欲生越七日自縊死

李氏諸生王名世妻流寇攻陷薛峯村氏被擄掠以禮自防賊不敢犯擁至堡城下招贖氏卽大呼曰我亦陷於賊以心跡不白爲恨母用贖也我欲死人見處耳遂以手批賊面大罵而死
汪氏諸生名世女節婦李氏其元配母也城古村民顏問仁妻仁浪擲家貧不支計將遠走氏委曲招之歸戒曰妾織紉足供朝夕幸無生他念仁如約未幾仁死氏不食三日其兄至從容問死生孰愈兄曰死固善如母老何氏曰然但歸告母我且強食母憂兄去卽自經柩旁
吉氏薛曲里民衛思德妻生二子一五歲一幼流寇入大王劫燒氏被執度不能脫抱幼子赴火死

孫氏生員張爾達妻事三繼姑孝無間言流賊焚殺破陳村小寨氏投井死賊退屍出十餘日面如生左侯旌表其門

解氏生員薛惟緒妻緒死氏剪髮一縷入其幘中勺水不入口者七日嗚咽而死奉勅建坊旌表

程氏王純妻被賊執罵不絕口尋投河死左公旌曰烈婦之門石公旌曰濯魄冰壺

衛氏烈士梁民養母流賊攻砦砦將破自經死

薛氏舉人王三聘妻三聘如京謁選死氏泣謂母曰夫嘗云不敢望生富貴人但願世有節義人何忍忘其言乎夫柩歸飲藥死

孫氏趙翔鳳妻流賊毒韓避居崖窰賊攻三日崖窰破懷抱幼子夫婦並投崖死

趙氏翔鳳女諸生薛助王妻避寇化石村崖窰寇攻之將陷氏
墜崖死左公表之

孫氏薛亢中妻流寇攻砦陷氏度不免與二女堅縫衣裳使不
離體同墜城死左公表之曰一門節烈石公表曰絕巘凝馨

張氏秦惟翰妻翰同父畊八代王賊殺父而繫翰索贖翰痛父
死罵賊賊貪賄不殺氏聞號泣登城罵賊賊並殺翰氏卽欲投
城共死爲人救歸與繼母相依奉事盡孝以終

劉氏孫一龍妻殉夫自經邑令表之曰貞烈

李氏諸生高冲漢妻雙華其婢妾也順治初賊劫村堡二婦各
抱所生子走李氏子曰發祥雙華子曰夢祥俱爲賊掠夜行至
潯畔李私謂婢曰吾父兄世皆官宦决不從賊入山此子付汝
李已卽以身投崖賊亂叫而李氏已在崖下昏而未死自亥

至午漸甦坐石上一賊忽過呼止馬不應以刀破之傷其項斜
一人自砦下視之則其姨母也扶至家事數月而愈雙華於李
投崖後私念二子不能兩存吾子賤非正出遂棄所抱而存李
子至賊所十餘日死不置懷賊義之亦不犯及以贖歸所棄兒
乃爲鄰人所收養在家無恙遂爲夫婦妻妾子母如初李氏庚
午舉人許州學正國琮女也

晉氏薛自通妻通死氏年二十餘一子守節撫孤順治己丑寇
至氏避居樓上樓破被擄欲死其子大中以死隨之不得便行
至柳枝村誑子他去投崖而死
薛氏趙西里民閭邦計繼妻夫死無出撫前妻子旣長爲娶婦
不幸子與婦俱死留一孫撫之成立順治七年寇至被掠罵不
絕口賊怒殺之

王氏衛士望妻夫亡年二十餘一男一女毫不爲顧哭泣數十日絕粒而死

吳氏儒士張雲樞妻諸生必昌女畧知大義于歸一歲夫死葬後謂其母曰人生在世節孝不能兩全吾唯一死而已愁鬱終日飲食漸減未幾而死

史氏王國彥妻國彥死泣不食葬後以衾自覆長卧不起家人叩之無一語未終月而逝

陳氏李濂妻濂病將死氏誓相從絕食數日父母以子女未婚勸止之隨居母家數年嫁娶畢謂其子女曰汝各自愛遂寢疾泣血數日而死

以上俱續志

馮氏巨纘忠妻夫故氏堅貞自矢守身不污有冤徒強犯之氏大呼力拒不從被冤勒死乾隆二十一年奉 旨建坊旌表

馮氏張翕妻夫亡守節或謀逼改嫁氏執不從將幼女先推入井隨亦投井而死

孫氏陳廷憫妻夫亡遺子甫五歲鄰婦探其意勸令他適氏曰吾有子冀其成立汝何出此不義之言於是引錐自刺其左目撫子元善成名壽八十而卒

節婦

陳氏相里堡里人適本縣郭庄里孫謙生子景仁甫一歲而謙卒陳氏時年十九誓不易節以貞潔固守至正十六年旌表其門

陳氏西庄里人適本里楊庸生子宗敏甫二歲而庸卒陳氏二十一歲誓不再配奉舅姑甚孝育孤子甚慈舅歿葬祭以禮姑瞽侍奉益勤洪武二十七年旌表其門

賈氏南隅里人適本縣王伯占生子三伯占亡時氏年二十九家貧勤紡績以事太姑並姑甚孝年八十四終名節無玷

馮氏范村里人適澗南何承祿年二十而祿亡家貧紡織誓不

二夫終身無玷

俱前志

趙氏晉四妻也四死氏年二十二一子昭方在懷抱兄弟欲奪嫁之氏矢志不從食貧撫孤每汲水河上必負其兒至水所則置之平地上汲已並負而歸率以爲常耕耘收穫寸晷不離夜則績紡家計漸立孫五人曾元至百餘卽龍盤先生賓王之八世祖母也

李氏諸生賈梧妻梧死氏年十七哭不欲生父母勸止之爲立綱布衣淡素守節七十餘年戴公匾之曰柏舟矢志蘇公曰柏舟堅節王公曰節可凌霜左公曰節婦之門

解氏趙承先妻先卒氏年二十家貧姑老二子一女氏課研織紡事姑至孝撫孤成立直指吳公參上其事扁旌食俸如例克丁二事在萬歷三十一年

薛氏趙揚芳妻芳卒氏年十九以姪爲嗣家貧守節壽八十二歲事在萬歷四十四年

薛氏吉來敬妻生子星燦方五歲來敬死氏絕粒嘔血誓以死殉翁姑以子幼止之遂事親撫孤紡績以給朝夕屢值荒年糠糠白啖教子星燦讀書中戊辰進士特疏陳情奉旨建坊旌表同氏張惟偉妻偉死氏年十九誓不他適遺腹子文轍爲諸生以善書名孫八人一鄉舉餘皆諸生壽七十

劉氏王養粹妻年二十餘夫死守節孝事孀姑與叔同爨子者都中甲辰進士

薛氏高文運妻運亡氏方十七歲守節立嗣年九十六終子名
自養娶妻李氏養出外不歸氏年幼無子坦然靜處無怨言年
七十五終

張氏吉自松妻流寇剽掠松被執拷死焚其家氏痛幾絕無棺
自負屍出葬至中途賊復來氏抱屍痛哭賊舞刀欲加旁一賊
憐之勸止得免既至墳掘葬畢欲自經而孤在抱忍不死時年
二十五歲無翁姑兄弟紡織度日十三年大荒家止米三斗煮
粥食子自啖糠糞自舂及夏粒米不入口聞變後益貧困苦
數十年壽九十二終子耀明賴以成立

張氏張星耀妻夫死年二十三無子毀容斷髮以死自誓翁姑
爲立嗣紡績課讀子省度爲諸生壽六十二終

李氏薛自強妻年十六夫亡舉一遺腹子堅心守節父母欲嫁

之氏不從遂欲絕往來子允中婦孫氏卽與二女墜砦城死者也

解氏儒士薛印淑妻能讀孝經論語夫死氏年十六一子甫三月誓不改節善事翁姑藥必親嘗孀居七十五年壽九十一邑令屢旌之

梁氏張光裕妻夫死未幾子永瑞亦死孝事翁姑葬祭如禮無子無孫年八十二卒有手書祭兒言詞意酸苦聲淚嗚咽慘不忍讀

孫氏諸生劉昌引妻天死年十九一子翁性嚴酷諸叔橫逆動卽譴阿氏隱忍守節年九十終

賈氏史可誌妻誌死氏二十餘二子一女翁姑皆老地崩於河紡績食貧養親育子年七十二卒

趙氏李夢春妻家至貧夫死年十九誓不再醮撫子成人壽八

十

吳氏秦文煒妻年十九夫死守節值奇荒誓不他適撫子成人

壽八十

張氏吳之音側室十九孀居撫嫡孤若孫曾劬勞三世人以爲

難壽八十

周氏吳自文妻夫病篤誓以死守後爲兄百計迫陷瀕於危亡
終不改節不愧堅貞

薛氏諸生王秉乾妻閨變秉乾遇害平陽氏年二十二歲無子
立嗣以守孀居五十八歲卒

高氏薛之奎妻夫客死他鄉氏罄笥資金歸葬立嗣守節數十
年卒